

Mūsa darbelē

Šalta, tomsi, tonke līn,
Dēinas ein kaskart trumpīn,
Vakarā zars bus ēlgiausē,
Be darbieliu nesēliausem.

Vērbalus sosēiškuosem
Kamē ožkavuotus,
Pončekieliu prēsēnersem,
Ka nešalto kuojēs.

Kas tamburka nosētvierus
Pruobīs nert bliuskelē,
Gal kas marga šalikieli,
Vo gal servetelē.

Čiops Janina dekopaža
Matiau, ana poikē daža.
Vo, Linutē vels ēš vēlnu,
Prēsēbuovīs ana pēlna.

No, ēr aš jug nekiorksuosio,
Nuosi nokabēnus,
Nelingousio, nespuoksuosio,
Baise nosēmēnus.

Jimsious ēr dekopaža
Maliavuosio stuotka maža,
Ka toriečiuo aš paruodīt,
Kū padērbus – pasēkuolīt.

Vēina dēina mums paruodē,
Kū padērbtē gal ēš muolē,
Poudu, vazū, torielkieliu,
ciekavniausiu dalīkieliu.

Davē loita muolē grīna,
Lēipē ēškuočiuot ī blīna.
Bus torielka, piaustiem skīlēs,
Diesem kiaušius par Velīkas.

Paveizietē nuognē kērb:
Kou Vandutē tēnās dērb;
Belēpdonti didili kiuocio,
Gal ēš anuo vaišins ciuocē.

Sosēkaupusi mūs Ada,
Lēpda ēš muolē, kāp be žada,

Dērb ē Vilma, ē Danutē
Vēsuoms patink če pabūtē.

Pakol galem, pakol jodam,
Lēguom vēs nepasēdoudam,
Nier nie kumet mums liūdietē,
Darba, žmuonis rek mīlietē.

2013.11.17